

四庫全書

集部

欽定四庫全書

集部

清江詩集卷一

詳校官太僕寺少卿臣李廷欽
中書臣劉源溥覆勘

總校官知縣臣楊懋珩

校對官中書臣高 中

謄錄監生臣陳 翼

欽定四庫全書

集部六

清江詩集

別集類五明

提要

臣等謹案清江詩集十卷文集三十一卷明
貝瓊撰瓊字廷居一名闕字廷臣崇德人元
末領鄉薦遭亂退居殳山明初徵修元史除
國子監助教事蹟附見明史宋訥傳考程慶
琬聲文會選以貝闕貝瓊為二人然陶宗儀

輟耕錄載妓女真真事云嘉興貝闕有詩今
真真曲載此集中則瓊一名闕審矣兩浙名
賢錄載瓊集二十卷明萬曆中所刻乃止三
卷此本凡詩集十卷文集分海昌集一卷雲
間集七卷兩峯集三卷金陵集十卷中都稿
九卷歸田稿一卷僅有鈔本流傳康熙丁亥
桐鄉金壇購得之始為刊板瓊學詩於楊維
楨然其論文稱立言不在蘄絕刻峭而平行

為可觀不在荒唐險怪而豐腴為可樂蓋雖
出於維楨之門而學其所長不學其所短宗
旨頗不相襲朱彞尊靜志居詩話謂其詩爽
豁類汪廣洋整麗如劉基圓秀勝林鴻清空
近袁凱風華亞高啟朗淨過張羽繁縟愈孫
蕡足以領袖一時鄉曲之言未免過實然其
詩溫厚之中自然高秀雖不能兼有諸人之
勝而馳驟於諸人之間實固無所多讓其文

亦冲融和雅有一唱三歎之音史稱宋濂為
司業建議立四學並祀舜禹湯文為先聖瓊
作釋奠解駁之識者多是瓊議則其考證古
禮尤有依據不但詞采之工矣乾隆四十五
年六月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

清江詩集卷一

明 貝瓊 撰

賦

鶴賦

余竊悲此鳩鶴之靈禽兮胡爲獨處而無鄰誠仙人之
駢驥兮閟寒暑兮三千饑不磔乎腐鼠兮渴不飲乎盜
泉生既困而憔悴兮夜長鳴而徹天月朦朧而將曙兮
風淅瀝而戒寒尚蹁躚而欲舞兮終磊落其如人戀青

田之故林兮盼華亭之大澤路中絕而忘歸兮媒甚勞
而寡匹頂的的以補丹兮毛毵毵而儼雪冀備君之曉
駕兮常結心於紫極欲抗音而復噤兮時顧影而自惜
淘河貪而無厭兮鷗又悍而不德彼優游以飽鮮兮亦
絢練而矯翼內深省而益悼兮豈以才而見賊希有氏
之西來兮忽余眷而踟躕肉不膏於九鼎兮幸托君之
階除諒一息而萬里兮奚孺子之能呼一引步而三却
兮思拔趾於泥塗苟懷恩而報施兮亦豈憚夫墮軀惡

其玩而無禮兮義獨潔而不污目四顧而冲冲兮白日
奄其西徂訪玄夫以決之兮盍舍舊而改圖覽中區猶
一盍兮曾何足以度世塗千起而萬滅兮陋紛紛之蠅
蚋寓寥廓之無極兮跨六合而高厲嗟網羅之雖設兮
已超然而獨肆將西歷於青城兮何太白之崢嶸杜宇
號而血吻兮天懵懵其無情孤九尾而猖狂兮夔一足
而伶俜望滄海之無垠兮會百川以東入悲精衛之舍
憤兮力既微而何及山孰別其有三兮洲孰窮其有十

扶桑不可以托巢兮蟠桃不可以爲粒日晝晦而淪精
兮雨蕭蕭而翹濕指神堯之所都兮九門鬱其嵯峨載
吹笙之王子兮招鼓瑟之女媧棲建章之高棟兮浴太
液之清波夾玉輶以翱翔兮友丹鳳而婆娑尚騁力於
廣達兮矢厥心而靡他

懷舊賦

并序

余春秋二十有四館於雲間夏景淵氏凡十閱霜暑
尤隆主賓之禮後去而覓舉武林遂畱西湖中罹兵

變東西奔竄邈不相知今年春因訪焉則已物故而
其子士文克承堂構余私喜其餘慶未艾也復觴於
漪瀾堂者累日高談大噱夜繼以燭退追舊好不能
不爲之慨然乃操翰爲之賦曰

覽雲間之雄秀拾海月於珠宮訪野王之荒臺俯鼈背
之方蓬命羽人以前導召宓妃而後從翳掩掩之宿靄
激泠泠之回風悼處士之永逝闔華棟而興歎或縱飲
而宵分或玄談而景宴攀渚秀之碧滋擢園英之朱粲

歷十載而一來感凋落之過半登高壠而長思夜漫漫
其勿旦樂旣往而哀襲何遭時之多難已焉哉物忌盈
而必隕運實關於否泰豺虎橫而麟鶩鷗鳴而鸞鎌
懸霞氣之徒餐奚神仙之可企閔余行之未已絕洪流
而東邁忍聞笛於山陽淚潸然而獨洒嗚呼千齡一息
兮放曠自娛伊人不可作兮死生異塗聊寄心於翰墨
悵旁眺而踟躇

大韶賦

并序

傳曰堯作大章舜作大韶韶繼也言舜能繼紹堯之德也周禮曰大韶禹樂名也言禹能大堯舜之德也前乎舜者堯非不繼譽也後乎堯者禹非不繼舜也特於舜言繼者法成乎堯也在譽之時法猶未成雖繼之而可繼之事未備舜協於帝在舜之時功爲已協禹雖繼之不足爲難矣則可繼之善善繼之功惟舜獨也是韶爲舜之樂無疑季札觀樂見舞韶箭者曰德至矣盛矣如天之無不覆情如地之無不持

載雖甚盛德蔑以加矣後孔子學之於齊三月不知
肉味曰不圖爲樂之至於斯也蓋知樂之盡善盡美
莫過於韶宜當時之感召丹朱在位羣后德讓祖考
來格鳥獸蹻蹻鳳皇來儀也然非舜之德致和於上
夔之樂召和於下何以臻此哉故述而爲賦不徒極
其聲音之美而且本之舜之德云賦曰

有東吳公子北走齊魯之疆觀於嶧山而見孔林之主
人焉主人曰公子之遊也亦將有所覩乎曰無也生於

震澤三江之上僻陋寡聞竊慕禮樂之事而六律七均
之制嘗究心久矣願有請於大人先生焉主人曰嘻吳
會東南之天府而天下之善音萃焉然公子猶有所未
足者豈將厭澹泊而說鏗鏘乎必將挾陳娥攜趙女摩
鶻弦考鼃鼓若是以爲樂乎公子慙然不悅曰覽裳之
曲唐之所以播越也廣陵之散晉之所以分裂也固不
足言矣若此者又夸狄之樂無異紂之靡靡以亡其國
者豈君子之所樂乎願聞其他主人曰七德之歌七德

之舞太宗之肇王業也亦嘗聞之乎曰伯者之事子孫無所法焉曰漢祖蹴羸龍飛沛中置酒層臺悲歌大風造基四百光啓西東若是何如公子曰猶有伯心之存也駁而未純然亦一世之雄乎請言其上主人曰抑聞武之六成乎武之濟河而西也馬散弗乘牛散弗服倒載于戈包以虎皮天下知其寢兵不用也爰作武以象功焉鼓以戒衆久然後戰也長戈連廷起其慕也發揚蹈厲時不可失也故一成北出再成滅商三成自北而

南四成南國是疆五成分左右以居周名六成復始而爲天下王振鐸夾舞秉戈鷹揚若是何如公子曰其容美矣此武事也未盡善也請言其上主人曰其惟舜之大韶乎當夫六府治三事和叙九功形九歌嶧陽之桐可以琢琴瑟焉雲夢之篠可以竅管籥焉泗濱之石可以磬而爲磬焉荆山之金可以範而爲鏞焉八音旣具而大體短脰之屬有力而不能走者以之爲鐘簴焉小體騫腹聲清而遠聞者以之爲磬簴焉其作也控以合

之其終也揭以止之洪者鏗而充清者磬而介淒切而不流泛濫而可會當夫朝廷之燕享宗廟之祭祀於是而奏焉升歌在上匏竹在下代作間奏秩秩有序或擊或戛或拊或搏清亮而高遠象乎天之渾淪廣厚而含容象乎地之磅礴一變一通兮四時之終始一散一潤兮風雨之回合是時也熙熙然八荒一春皞皞乎洪荒大樸格三苗於洞庭丹朱賓而有恪俯而聆之純如辛甘之相濟皦如有倫而莫敍詬如斷玉之復續繹如驪

珠之碎落飛流合而萬壑雷轉清風生而天籟交作吟
九淵之老龍唳九臯之玄鶴旣玄妙而悠揚亦和平而
澹泊無急微噍殺以感其憂無囁諧慢易以感其樂其
動於物也容何爲而肅若神何爲而來思獸何爲而舞
於土階鳳何爲而翔於茅茨明協乎大章博儻乎咸池
所以保無窮之治以示安而不忘乎危也悼六龍之南
巡歷蒼梧而上九疑阿母之玉琯猶在湘靈之錦瑟空
悲悵遺聲之寂寂叫有虞兮遠而然而齊之有韶陳亡

而流於茲也海外之有韶聖人之化播於蠻夷也宜季
札觀之而知德仲尼學之而忘味彼武之六極於陰特
著其武功此韶之九極於陽實昭其文治也公子以爲
何如公子迺避席而謝曰至矣盡矣不可以有加矣主
人曰未也請授以九德之歌其一洪流橫曰玄黃判風
氣開洪流橫民乃災五行汨帝爲哀禹治之啟始孩決
九川平九垓百穀生田每每其二洪流殺曰洪流殺兮
民災旣除山有鳥獸兮川有魚爰可食兮可居胥樂且

歌兮母忘厥初其三三苗格曰惟聖宣聰撫有九圍蠶
蠹三苗險阻是依出師于南奮我帝威我師旣還苗亦
東歸其四四凶黜曰德與刑兮國之經四凶斥兮八元
在庭帝無爲四海寧其五正德之歌曰惟天降命物必
有則民之瞢瞢胡迺自賊五教不行禽獸相食聖人龍
飛四方之極其六利用之歌曰水旣平兮別九州下爲
隰兮高爲丘徒則軒兮涉則舟以羨濟乏兮百貨流財
孔阜兮樂且無憂其七厚生之歌曰下民孔艱兮遭墊

溺寒我衣兮饑我食我無民違兮父母職其八鳳皇來
儀曰堯不德兮舜不辭授以天下萬物治寒暑無易風
雨時簫韶九奏朱鳳儀其九萬世賴曰天覆地載高廣
莫測孰參贊是俾衣而食帝治天下如埏如埴萬世賴
之安知其力公子曰嗚呼禮廢樂崩幾千秋矣而始聞
主人之宏論乃復爲之歌曰雅南已亡兮流盪曷正歎
栗雷怒兮空桑無聲綠綺不陳兮薦檀槽與秦箏妖倡
爲妍兮嘯鸞鵠而啼燕鶯孰究夫大韶之盡善盡美兮

實巍夫六英六莖後千載之聖人兮集厥大成安得聞
九奏於清都兮御天風而上征

不礙雲山樓賦

并序 附考華亭
張溪楊謙之居

赤松溪楊竹西氏築樓一所在居第之南而海中大
小兩金山飛舞而前因取杜少陵詩語額之曰不礙
雲山鍊崖楊先生爲之記夫有雲山之境者恒不得
其人有雲山之趣者恒不得其地而茲樓獨領其要
朝嵐夕翠不起燕坐而盡得之豈非先生所謂境以

人高人如境勝哉竹西嘗命余爲賦久未克就歲闋
逢執徐之春放舟溪上始獲登竹西樓遠眺五嶺三
泖窮目力所至爲限飄飄乎若一羽凌空飛度三素
雲中也命酒共酌操壑雷之琴歌白雪之辭極歡而
罷因援筆爲賦不惟狀雲山之勝且寓感今思古之
意焉賦曰

巍乎層構之造天兮旣內敞而外隅滄海浩浩而左滙
兮銀河淵淵而右紆激回風於四阿兮宿雲氣於樽櫨

七星挂於北戶兮送結鄰而迎望舒荷倒植而苗苗兮
芝旁生而扶疎實仙人之所居兮候安期於虛無兩金
嗟羲而並峙兮蛾眉巧以迎予斷太華之仙掌兮翦蓬
萊之左股埽新黛之聯娟兮洗海門之秋雨九山北起
而向背兮翩鸞迴而鳳舞泰山拱以旁繞兮列邾莒於
齊魯雲霏霏以晨蒸兮散玉衣而輕舉何卷舒之無恒
兮倏爲龍而爲馬羌不起於燕坐兮挹爽氣於樽俎招
夸娥之二子兮夢高唐之神女聊徙倚而四望兮悼吾

行其孰與日散輝於斷岡兮鳥沒影於平楚美人期而
中訣兮魂煢煢而若覩吾企雲以申誠兮山復險而道
阻願從赤松以授道兮邈清塵之萬古昔祖龍之帝六
合兮渡浙江而東巡王氣颯以燐滅兮璫草萋而自春
悼三女之中天兮高塚崒其猶存暗沙窰之風雨兮猶
想夫萬乘之雷奔偉希馮之夙悟兮逮九齡而知名荒
臺圮而荆棘兮餘鳥跡之縱橫金石輟而弗聞兮激流
水之泠泠平原振藻於東吳兮翔雙鳳於太清胡鹿苑

之一敗兮竟鎔翼而就烹黃耳去而不返兮唉鶴寂而
無聲羨記室之見幾兮遂南旆而孤征念丹轂之易憤
兮鱸秋美而可留卒全軀於濁世兮歷千春而尚榮尋
古洞之丹砂兮弔黃鶴之仙人天瞢瞢而無光兮哭深
林之帝魂白鹽皎以雪積兮火萬竈之飛煙憤仲父之
厲階兮冀海水而桑田博陸忠而覆族兮宋南渡而肇
祀漢實薄而少恩兮獨勿念乎厥始嗟時俗之好怪兮
語荒唐而無紀竦余轡於高丘兮濯余足於清泚訪吳

子之獵場兮平蕪綠而靡靡挾白羽以命中兮感翩翩
之飛雉寵西施以亡國兮猶痛恨於後嗣爰抗音以高
歌兮酌兕觥之芳醴諒高明之可居兮胡汨沒而弗止
陋齊奴之金谷兮歲曾幾而荒蕪雪月空而燕去兮鳥
雀啾以驚呼斤粉黛而弗貯兮列圖史而自娛誣曰雲
動不測氤氳霧靄勃勃夢夢兮山靜不遷欒崟巒葉鬱叢
叢兮飛樓蔽虧青延翠攬棟隆隆兮瞻望美人於彼夕
陽思無窮兮弦吾素琴目送飛鴻煙空濛兮

玉笙賦并序

昔余主雲間夏景淵氏凡歲時燕賓合族必奏伎爲驩鄭雅並進余甚陋之錢唐陸生攜玉笙相過會於呂紫芝之玄霜臺爲作數闋瀏亮淒切不啻聞鈞天廣樂於洞庭之野使忘客居之憂遂出句曲張外史玉笙引求余和因賦長短句以贈之旣而余遊吳門觀濤江返寓於海昌之黃灣與生不相知者二十年而玉笙之音猶隱隱於耳也雨牕孤坐壹鬱無聊友

人張子雨來謁手持玉笙詩一卷曰生所得近百篇
兵變之後亡佚不存此特記其尤膾炙人口者今附
李氏子求公詩於二百里外可謂好之篤矣余讀而
喜之且知玉笙固無恙操翰欲書向之所作病其骯
骯無氣譬諸瓦釜廁於黃鍾大呂之間其不斤而罵
者鮮矣然俯仰今昔悵然有感於中可無復於生耶
夫笙簫之器古之人精音律工文辭者已極其形容
之盛玉笙之名雖著而其器則未見也故略而不及

余因摹寫其聲著而爲賦以補其遺焉辭曰

海岱之貢嶧陽孤桐可以琢師襄之琴焉三楚之產蒼梧叢篠可以竅伶倫之管焉皆足以備八音而宣八風矣猗歟王子易匏以玉肇制摹形節音赴曲方其厭甲觀樂名山瑤臺九層上通次寥其處崇矣不若廣成之宅空同也撞鐘擊鼓長夜之飲其樂極矣不若軒轅之張洞庭也於是點蛾眉屏皓齒慕神仙遊洛汭接浮丘上太空屑瓊瑤而餐露氣兮彼多欲之侈心吾獨好此

笙竽兮託風雅以禁淫削霜節而束雪莖兮又惡其材
之弗任惟西極之奇璞兮乃產乎崑崙之岑鍾氤氳之
和氣兮託閒寂之太陰爰命工以采之兮跋峭阻而抵
巔峯古雪夏積而不化兮竦青壁之萬尋虎豹畫出鼯
雌夜吟王孫跳躡前呼怪禽縣黎結綠棄而抵鵠兮曾
莫得廁夫海錯與蠻琛也觀其白如截肪黃比蒸粟氣
成虹蜺光燭日月溫而有文剛而不缺嗤魏叟之遽擲
悼荆人之再別抑顯晦之有時胡珉玒之罔辨全匪琢

而爲環斷匪椎而爲玦爾乃垂効其能媧陳其義揮昆
吾之利刃鏤爲筭兮十二紛攢列以參差象鳳翼之相
比勢欲振而孤飛聲若壹而羣嗟黃鐘作則溫風生而
春葩紛敷清商奏則嚴霜隕而秋葉凋悴何其神也惟
匏也滯惡有玉之清越惟竹也濫惡有玉之和平此其
又足貴也當夫桃含笑而春媚月揚彩而夜明寒流咽
而交赴浮雲翳而不行惜芳節攄幽情左宓妃右雙成
嘉肴薦旨酒傾申白雪以廣意隔絲霞而飛聲湘靈不

敢鏗其瑟羸女不敢戛其箏厥狀伊何初鬱勃而欲泄
忽嘈啐而交啼鳥鳴春而嚶嚶蟬號風而嗟嗟或始剽
而卒肆疑將絕而復綴髮鬚蘇門之嘯翔鸞鵠於崖際
又似梁妻夜哭淚盡而不能爲其氣其悲也語刺刺以
將別其怒也心悄悄而不遂其婉也有賡歌之雍容其
激也有特立之清厲其翕也若遠而不攜其和也若反
而相濟其絡繹也貫驪珠之纍纍其縹渺也絮飛空而
無蒂羈臣悅而解顏寡婦哀而掩涕嗚呼鶴駕去而不

還悵市朝之屢改革不委泥沙而同碎例金石而猶在
望公子於雲間識羽人於東海悲逸響之無傳欲持此
而奚待呼之而虛足以宣其壹鬱吸之而盈足以平其
塊磊澀間發而更奏誤一聽而增慨乃爲之歌曰故都
墟兮草樹秋鳳皇去兮百鳥喧啾感今思昔兮徒離憂
安得如王喬兮從浮丘又歌曰酌紫霞兮羞玉芝舞回
波兮吹參差天湛湛兮白露滋君不樂兮欲奚爲於是
曲盡再鼓夜飲厭厭攘衆簧而愈放抽獨繭而尤纖遂

使伯夷去其介仲子失其廉孟賁忘其勇京兆易其嚴
海若爲出天吳爲笑老鶴無聲清猿絕叫肅賓客於四
座輶野王之三調雖中郎督郵之善音亦莫洞其弘妙
乃知玉之爲物衆德之萃笙之爲樂衆音之要是宜協
九奏而致鳳皇媿六英而薦清廟武夷鏗邃徒爲隱者
之具龜茲觱栗特從時俗之好也

灌園賦并序

錢唐潘時雍治圃於城東門築垣四周引泉成渠以

灌園自號其意以爲無功而食人之食者元氣之賊
萬物之蠹也故勞焉而後食身執其役以給朝夕之
費二親無戚戚之憂萊妻有同志之驩吁豢於富貴
者不知澹泊之爲高耽於寵榮者不知道德之爲大
既盈而覆古今一轍則灌園之利不已多乎昔於陵
仲子辭三公而爲人灌園充其廉也向秀呂安灌園
於山陽安其逸也潘岳去長安令而閑居灌園病其
拙也時雍亦若人之匹與或者疑其居有闢闔罔利

之習座有俗客鳴聲之聒又安能效彼之所爲者非知言也乃述賦以廣其意云賦曰

步青門而長嘯遊余心於古初目藻麗而弗近敦樸素而爲廬資灌園以自業類潘岳之閑居食五鼎爲不及飲一瓢爲有餘幸免隸於征伐或弦琴而讀書恥桔槔之尚巧逐末景而區區其地襟江帶湖青紆黛蓄拱以連山突怒起伏實東南之形勝爲帝王之行都周金城兮萬雉列甲第而當衢族茂許史家儼陶朱肆有藍田

之玉斗量南海之珠技博古今之妙音會八方之殊傾
國過乎燕趙跋利屣而曳輕裾若神人之綽約耀冰雪
之肌膚於是命相開藩鎮我南服象天河而鑿池凝紫
微而建閣集貂蟬之濟濟衛虎豹之肅肅彈慮乎庶務
者蕭曹之倫鋪張乎太平者枚馬之屬衣襲綺紝食兼
梁肉塗比車蓋庭奏綠竹巖棲者未覩其盛家食者思
發其所畜也乏匡時之明略乃退齒乎齊民墾不食之
棄壤托鹿豕以爲羣疏濁流而遠注闢斜徑而支分筍

長渭川之竹菜生雲夢之葷蒲荒秋雨松茂早春甘者
如齊脆者勝芹始芽出而冒土忽葉布而覆雲茶三名
而可食鵠五色而成文候靈雞而畢起庶戒逸而務勤
冀擷秀於寒暑必浹潤於朝曛恒獨往而無求爰四顧
而欣欣乳鳩呼而相應惡草蔓而當芸感生成之攸遂
亦有藉乎人人其或風雨之晨燈火之夕俎豆娛親琴
尊命客渝竿引鮮充庖有辛夏果磊落秋瓜輪囷茲田
夫之所美又焉得獻之吾君嗚呼章綬不優於野服瑤

臺何異於蓬室諒乘軒而取譏雖抱甕而奚恤寧陋彼
而榮此聊逍遙以終歲金谷廢而蛙鳴玉津空而狐穴
中雖侈於五畝後孰惜夫一石乃爲之歌曰朝汲於河
兮其流湯湯暮觀我圃兮其葉已黃炎風卷沙兮白日
藏尚昏其事兮毋棄而荒又歌曰登彼陸兮猛虎噬人
涉彼海兮白波滔天我藝而灌兮入以事親誓勿彼適
兮危其身歌既闋幽情暢白露下初月上陶然一適混
乎無象委通塞之有時蹇余行其焉往

鍊硯賦

客有鑄梁州之鍊爲硯者持而售於讀書主人主人用之以代陶泓焉風雨之夜滅燭就寢夢一猛士被甲戴胄面純黑而甚偉進而告曰時哉天乎吾之利天下者多矣胡枉吾之材而置之散地乎主人乃賓而問之曰若非常溪之族乎若非泰山之英乎若非九牧之所貢者乎吾聞君子隨時而變化若何爲而懸於天乎介者曰吾蜀之良也初軒韓之破蚩尤也爲戈爲甲爲劒爲

戟爲鈎爲鍛爲鎌爲鐫氣重六師威加四極神化蒼蛟
而雷電爲之繞體光吐白虹而日月爲之奪色漂大野
之流血落高天之迅翼王者得以成其功武夫得以奮
其力此吾有功於戰伐雖缺折而莫之惜也逮秦而滅
六國吞八荒聚其族而銷之亦何殊夫鳥盡而弓藏精
爲神兮十二守故宮之淒涼世復以吾之利不可廢也
爲刀爲泉爲布爲帛通四海之利法九府之式勢傾國
中薄青衣之五銖道濟天下斤黃金之萬鑑入紫闈排

朱門贊天地行鬼神弱者以強而卑者以尊此吾有功
於貿易雖流徙而莫之寃也夫何挫吾之芒折吾之氣
祝融獻功即墨爲謚儕銅雀之破瓦曾不及馬肝雉目
之爲貴苟策功乎翰墨之塲蘄亟黜而鑄錢鑄之器也
主人曰嘻子何局於彼而不達乎此耶六合既清可以
去兵而行仁萬民旣一可以去貨而談義凡子之爲兵
爲貨皆聖人之不得已也今主人書有屋漏之痕文有
湧泉之思子歸吾而畢命吾托子而見志焉夫射鵠而

無失者壯士之志力田而有秋者農夫之心董生成名
於下惟李侯卒業於磨鍼季子引錐而佩印買臣負薪
而腰金長卿題柱而遂顯終童持節而重臨並假翼於
霄漢終脫身於山林故桑君已擢第於昔而予獨何疑
吾於今也哉山房月微燭光吐日蟾蜍腹冰飢鼯潛出
方深思而遠討每含辭而涉筆搜六籍於蠹餘補千金
之狐腋固資器以成能已辱予之我即及其凌天衢出
風埃逍遙乎玄圃放浪乎瑤臺校竒字騁逸才聽流鶯

於太液接羣龍於蓬萊右毛穎而使御左陳玄而爲陪
滴金盤之秋露步玉堂而躋上台顧不偉歟且鳳味託
眉山之重龍尾出端溪之先或以聖人之德著或以才
士之銘傳是皆一石之清潤激波濤於百年始皇徒驅
而梁海神媧竟遺於補天宗其人而名世亦宣力乎簡
編而子獨耻於爲研不思與是數者一其高而同其堅
乎介者伏而謝曰先生之言至矣不復有所悔矣逡巡
而退余亦驚寤用志於齋不易吾素

醉賦

余讀柳柳州答吳武陵書稱其醉賦及答客問而其文逸不傳因賦之以補其遺辭曰

弱水竭三山折少君滅石芝歇吾將築九千仞之麴臺
介風雲而賓日月援青天之北斗釀千秋之古雪膾長
鯨於東海肉狡免於三穴縱長夜之樂負一世之豪脫
處士之一角巾解仙人之五色袍右挈吾榼左操吾瓢
出上方之酴醿引西國之葡萄流白雲於春甕落丹泉

於夜槽摩玉環之鶻弦裂雙成之鳳簫六么作霓裳閣
朝五斗暮一石耳不及於聽音目不及於觀色蟻萬
鍾泥沙白璧力過孟貴者醉能繫其頸辯雄張儀者醉
能斷其舌略兒女之愁而不爲動心夷王侯之勢而不
爲折節太湖三萬六千頃醉俯之一兕杯太華三萬六
千丈醉覽之一螢垤擊缶而歌心馳燕趙拔劍而舞氣
吞吳越走桓溫之老兵殲周顥之狂客又烏能蹈規矩
而守繩墨也於是牖天地廬八荒神交麴生封侯醉鄉

洩洩烏陶陶焉率乎日而爲常奈何武公老而自尤屈
子逐而自潔囚酒星於大獄斥酒池之覆轍絕纓而幾
失其驩吐茵而幸貸於責不知堯舜樂之不厭孔子溺
之不絕也九州幾裂百川無迴豪傑相噬白骨生苔吾
其與辱首之徒相忘於無事之日乎淳于髡之滑稽於
戰國乎與河東之季從時毀譽乎漢相之和臾而歌呼
者乎與徐邈之中聖乎阮籍之放曠而適其性乎與荷
畚之伯倫乎抑投轄以畱賓者乎與待詔之王績乎辱

高斥楊之李白乎與陶潛其乾沒於義熙乎山簡遊於
習池乎與甕下之吏部乎韋曲之杜逍遙於率府乎嗚
呼與世無忤惟酒可從醒者爲愚醉者爲智醒者爲介
醉者爲通天下之憤非醉不釋天下之難非醉不蒙命
輕一羽氣吞長虹決銀河而洗竽繫扶桑之六龍復酌
吾以大白渺海闊而天空

石經賦并序

五經載道之器也秦燒詩書經燬而道自若也漢求

壞爛之餘書禮樂已殘缺十九惟易以卜筮存詩以
弦歌存春秋以口授存而俗儒章句之徒傳會穿鑿
使五經大義不明於天下不亦悲夫靈帝熹平四年
議郎蔡邕與堂溪楊賜馬日磾張馴韓說覃颺等求
定六經文字詔許之邕乃書丹於石命工刻之立於
太學門外時四方摹者日以千計然未知道之所存
也特以邕之書耳洎唐文宗時高重爲國子祭酒與
鄭覃復刊定九經於石嗚呼漢唐石經已風摧雨剥

於數百年之久與岐陽之鼓嶧山之碑同一榛莽已
因推衍其凡以爲之賦云賦曰

繄聖作而明述兮尼父集夫大成歷四海其遑遑兮威
鳳瘡而不鳴吁嗟時之終否兮託空言而載道世莫知
余奚恤兮閱萬世其果果羸既暴而不德兮舉六籍而
火之薄先王之仁義兮尚法律而爲治悲祖龍之鮑腥
兮阨亦湮而無烟易幸存於卜筮兮詩亦肄於筦弦春
秋闕而不出兮禮樂佚而不全科斗蠹於壁中兮光白

虹之射天羸遂僨而劉王兮家六合而寧謐乃偃革而爲軒兮掇壞爛於十一泊六葉而遘武兮炳大明之當中黜百家之淆亂兮一道術而異同易科斗而爲隸兮復家畜而人誦道固不可泯兮亦何待夫汗牛而充棟兮時既降而道晦兮經蠭滅而莫收割申勸之或舛兮衆咸失於校讐屬熹平之四祀兮帝孝靈之當宁正俗儒之穿鑿兮偉中郎之博古辨魯魚與亥豕兮刻南山之堅珉巍乎四十有六兮樹翼翼之成均鉤鐵畫之屈強

兮妙骨氣之洞達非餓隸之羸形兮非寒巖之枯朽非
醉草之欹斜兮非劒舞之渾脫初崩雲之恍恍兮粲列
宿之離離鸞振翼以夭矯兮樹交枝以參差鷺鳥攫以
乍飛兮羣鶩遊而戲海彼鶴頭與隼尾兮曾何足以爲
態捷奔泉之渴驥兮縱入草之驚蛇勢或埒於墜石兮
體已悟於畫沙觀者紛其堵立兮車連連其日至豈八
法之是尚兮幸經存而不墜陋石鼓之苔剝兮鄙漆書
之土瘞觀竒陽而偶陰兮窮太極之有無感堯湯之禪

放兮求厥中於典謨何二南之和平兮悲雅變而逮胡
儀三千與三百兮伊朝夕之攸執何曲折而精微兮謹
一出而一入嗟聖人之憂世兮徒感麟而掩泣二百四
十二年之筆削兮善既勸而奸戢正夸夏之内外兮亦
綱常之攸立夫何經之徒存兮昧古訓之時式痛賣官
而列肆兮盛後宮之傾國奄豎黨以盤錯兮又孰恤乎
社稷九州裂而鼎峙兮黎庶化而爲豺經雖鐫而何補
兮政與道而相乖逮有唐之文宗兮乃繼漢而有作聲

巨石之嶄嶄兮列廣庭之落落吁回首其幾何兮悉風
摧而雨剥又斷缺而莫辨兮委荆棘之漠漠吾恐爲沉
犀於蜀門兮同刻鯨於昆池曾不若慶雲與松風兮託
良徵而効竒又焉得紀功千載兮儼岣嶁之禹碑諱曰
已焉哉石經泐兮剗藤出書連車兮布萬國撫遺墨兮
相得失道之存兮昭白日

春雨賦并序

孟春之月時雨方降周視草木莫不鬯茂條達造化

之妙如此宜孟軻氏以況君子之教也余少從師讀書而知仁義道德之說求之甚銳晚不加進則氣質昏瞀可知其不得如草木之化必矣故作春雨賦以自勗且示子翹使及時而用力焉其辭曰

維著雍涒灘之歲正月初吉土乃脉發融風應律布春令於遐陬回朝光於潛室燒經雪而未蘇蟄俟雷而將出欣違寒而嚮溫冀節勞而從逸於時靈雨斯降生我百穀伊農之慶匪珠匪玉以今揆昔載披厥錄一歲之

候三十有六觀其屯雲蓄而成衣隕石騰而傅羽紛块
北以隨風黯冥濛而交霧乍縈空而絲散或綴物而珠
聚方疑有而可聆恍若無而莫覩醞比玉之醴泉泣如
飴之甘露無町畦之或間沛旁流而布濩粲丹葩以耀
林滋綠苔而生路紫鱗駿而爭躍繡頸呼而猶怒何浹
辰而未休逮中夜而復迅閑簾櫳以護寒覺琴書之含
潤田夫悅而昏作羈客聞而釋愠余何思而何營感四
時之錯運欲抗音而就繼耿殘釭之落燼嗟杏壇之諸

子各因材而爲訓躬四勿而不疑契一言而奚問若時
雨之所化何力約而功峻憫畸偏之弱質奚古人之敢
希瞻龜蒙其旣遠獨悵悵而安歸羌及時而猛晉懼失
道而愈非當霖霖之渥洽悲事往而心違願爲杞而在
山沾一溉於旣仆竦百尺以參天任叔負於崇構願爲
稼而紛敷冀常膏於朝夕託瑚璉以薦芳曰神明之可
假願爲芝而三秀濯朱柯而久鮮豈幽人之所食表土
德於甘泉願爲桐而不夭被玄液之滲漉斲有虞之清

琴協宮商以成曲材苟摧而爲新耻綺紝之徒襲何余
疾之難遷徒遑遑而汲汲屬萬族之方新期徃訓之攸
執惟渴飲而求足信江海之可挹來侁侁之小子庶佔
畢之是習知與行其並進亦何憚夫弗給孰爲高之可
仰孰爲堅之可入眷躍如之在前思卓爾之有立感春
雨而成章庶乎學之恒緝

白鶴賦并序

成均教樂所大椿一枝有二白鶴集其上春來冬去

亦物之異乎類者余愛而賦之其詞曰

夫何雙鳩之皎潔兮孕異質於金方豈仙鼠之變化兮
狎野禽而回翔肖刻玉以爲形兮耻襲錦以爲章性弗
慧而徒勞兮時自珍而久藏幸主人之見存兮託廣庭
之嘉樹既不爲其所好兮亦不爲其所惡夕同棲而晨
興兮春偕復而冬去振霜翎而益鮮兮與月魄以爭素
羌所賦之純美兮雖處汚而不淄女恒尤於衆嫭兮士
咸病於見竒羞鵠鵠之上獻兮悼鸚鵡之就羈茲惴惴

而懷懼兮尚飄飄其安之王睢摯而有別兮鶻遇秋而
愈急彼各挾其能兮固非余之所習何意氣之敢矜兮
藉光輝之時及顧微軀以徘徊求故林兮永戢

金鑑錄賦

帝開元廿有四載兮屬十秋之良辰進絲囊與寶鏡兮
衆紛紛其相循臣九齡獨見其微兮述今古以前陳監
美惡於一鏡兮盍監得失之在人鏡狹中而無隱兮洞
萬殊而咸覩亦俯仰而取容兮月或冥而爲土書炳炳

其如星兮與湯盤而爲伍期補袞之萬一兮竊比夫翼
周之山甫惟一心之易蠱兮恒惡直而好諛臣固不能
矯以隨俗兮盍圖終於厥初使銘鼎之辭偶符兮寧取
無逸而爲圖集厥類而成編兮奚翹玄冥之百鍊光夜
吐以屬天兮何益君之聞見堯舉舜而禪之兮詎舍朱
而無恩撫九州之廣大兮非黃屋之爲尊饑吾餐使之
充兮寒吾裘使之溫曰精一而執中兮本乎堯之一言
心凜凜其履冰兮罔一息之不存茲爲鑑之金背兮君

日監而勿昏至暴秦之并周兮與黔首以爲仇阿房岌
以造天兮極虞樂而未休慕神仙之高舉兮求弱水之
三丘徐市去而不返兮贏已儻而歸劉茲爲鏡之水心
兮君日監而勿流手三尺而崛興兮一六合以稱帝丈
景嗣而恭儉兮道益昌而弗替後竭內以事外兮徹孰
優夫二世數四七而遘武兮洗日月於方翳痛桓靈之
孱弱兮操遂乘而莫制茲非鏡之可監兮焉用夫渠搜
之火齊彼典午之承魏兮閨螳雀之相攻繇載盛而易

顛兮審厥子之弗聰洎渡江而清談兮祖莊老以成風
梁崇佛而舍身兮胡貪地而受降叶破金甌而不顧兮

士重介而談空茲非鏡之可監兮焉用夫赫連之青銅

目或瞽於衆矯兮耳或黃於新聲受嬖姐而殷墟兮褒

代申而周傾彼小白之創伯兮尸中國而會盟卒託子

以名亂兮肉已蛆而兵爭繼有漢之人彘兮亦累帝之

聰明抑遠監夫申生兮茲吾君之容成我太宗之戡亂

兮羌修文而偃革惟至誠以馭下兮韜神明於玄默斥

美麗而擣素兮懼燕安之爲賊故孜孜以求言兮庶日
蹈夫繩墨出宮女之三千兮來獄囚之四百彼刻民猶
歛膚兮悼徇私而亡國知識弓之難精兮譬作室之屢
易立帝範於子孫兮茲吾君之夸則君之大畧誠不可
及兮旣內平而外從焚珠玉固足美兮復兩坊之樂工
相姚宋爲知人兮奄豎爵而加隆誅后戚以示公兮兆
夫婦之不終禮旣輕於樹子兮化天倫爲寇戎太廟壞
而弗戒兮爰汲汲於東封曰祈福於太山兮又曷若爲

民而建中臣卷卷於匡輔兮冀君心之日檢也恒法堯
而非桀兮事必防乎其漸也義或媿於大訓兮實將垂
之琬琰也中獨懷此耿介兮願從贛愚之汲黯也面從
而背違兮臣固不敢也君苟不察臣之忠兮何貴乎鏡
之照膽也使如盤龍之闕於匣兮羞舞鸞之同掩也宜
帝覽而味其言兮特優詔以褒之惜不久而中棄兮肆
匹夫之所爲卒信讒而爲忠兮斥荊州而無疑內玉環
於宮中兮竟胎禍而速災叶子胡離而播醜兮君旣耄

而弗知闔閨腥於戎馬兮夜倉皇而獨西駐六師於馬
嵬兮猶不忍於蛾眉四海繹騷兮九廟俱夸曠蓬萊之
故宮兮濁太液之秋水徵野鹿之銜花兮痛羽衣之何
在叶豈非人監之既亡兮徒馳使於千里天眷眷於神
堯兮幸兩京之載清居南內之淒涼兮感風雨之鈴聲
信丹宸之有歲兮伊君道之當明金鑑豈一時之可珍
兮歷萬古而爲程

清江詩集卷一

欽定四庫全書

集部

清江詩集卷三

二

詳校官太僕寺少卿臣李廷欽
中書臣劉源溥覆勘

總校官知縣臣楊懋珩

校對官助教臣汪學金

謄錄監生臣洪策

欽定四庫全書

清江詩集卷二

明 貝瓊 撰

四言詩

猛虎行

有虎有虎在坡中野高步風生何物敢侮以比直臣獨立無與前稱長孺後載丈舉亦有埋輪復聞破柱爲時所憚豺狼氣阻奈何令人使我懷古

五言古詩

雜詩七首

我聞度朔山蟠桃何鬱鬱千歲纔一花結子復何日食之云不死敷腴反枯質跨鶴凌九天將期五龍匹諒非廣成子欲待安可必

祖龍帝六合不暇談黃虞且復求神仙入海窺方壺置酒阜鄉亭超然忘故都空畱赤玉舄安期今有無

種桑飼春蠶桑葉何沃若種瓜待秋摘瓜蔓何漠漠春秋各有獲在野猶可樂君看金張館草深狐兔宅勿較

是與非看雲倚高閣

大哉龍門樹鬱鬱上參天根株豈不固小草還相纏蓐
收行素秋淒其風露寒病葉危欲墮翔禽亦已遷朝華
痛夕隕掩淚復何言

結束將何之龍門訪陳迹戒途及良辰置酒別親戚迨
迢越千里人馬疲登陟大江不可濟天方限南北悵然
迴吾駕去從山林適

春山一雨過百草皆縱橫百草不出山山中人遠行懷

金別妻子殉祿辭父兄寒暑忽已易燕趙千里程龍門
能碎舟風浪安可爭性命輕鴻毛若爲朝暮營愧此山
中草萋萋林下生

薛公未罷相賓客競相傾一朝偶失意門無珠履聲貴
賤已如此何論死與生秋燕辭空室春蝶抱留英盈虛
信物理聚散亦人情達士甘寂寞力耕謝華纓道尊豈
戀祿心遠孰希名腐鼠非吾餌朱鳳以時鳴悠然動遐
想五鼎益爲輕

真真曲

姚文公爲承旨時一日玉堂燕集聲伎畢奏
有真真者操南音公疑而問之泣對曰妾建
寧人西山之苗裔也父司筦庫於濟寧坐盜
用縣官財賣妾以償遂流落倡家公憫之遣
使白丞相三寶奴爲落籍且謂翰林屬官王
棣曰汝無妻以此姬配汝吾即其父也貲裝
皆出於公棣字棣華後官至翰林侍制噫以

西山之賢子孫陵遲疑不至於此然辱於始而正於終是亦天也貧谷筆談記其事余乃賦四十二韻而沈鬱悽婉亦足以盡其大略矣

斷綠棄道邊何日緣長松墮羽別炎洲不復巢梧桐請君且勿飲聽我歌懊懷在昔全盛時冠蓋紛相從盤游易水上意氣天山雄金刀手割鮮酒給葡萄濃坐有一枝春秀色不可雙娉婷劉碧玉綽約商玲瓏寶髻金雀

釵已覺燕趙空或聞操南音未解歌北風上客驚且疑
姓字初未通問之慚復泣乃起陳始終妾本建寧女遠
出西山翁父母生妾時謂是金母童梨花鎖院落燕子
窺簾櫳迢迢官朔方南歸山水重侵貸國有刑桎梏加
父躬粥女以自贖白璧淪泥中秋娘教歌舞聲價傾新
豐永爲倡家婦遂屬梨園工覽鏡拂新翠吹簫和小紅
身居十二樓屢入明光宮京華多少年門外嘶青驄自
傷妾薄命失路隨秋蓬不如孟光醜猶得嫁梁鴻客聞

爲三歎祖德寧未崇回黃忽變綠人事何匆匆有客傷
緹縈無人憐蔡邕遣使白衣相削籍歸舊宗小史三十
餘勿恨相如窮配汝執箕箒今夕看乘龍鴛鴦竝玉樹
鸚鵡開金籠銀甲不復整紅牙不復擬提甕自汲水繺
綸亦御冬應非事羊侃頗類歸建封琵琶感商婦老大
猶西東崔徽怨顯輞浪寫丹青容依依章臺柳落絮春
無蹤小妾恨題驛竟與瓊奴同時多因坎坷事或欣遭
逢焉知百尺井歛登羣玉峰借問爲者誰內相姚文公

飲酒二首

六龍驟朝暮百川無西迴所以陶阮輩落魄事酒杯共
盡生者樂勿爲死者哀借問東方朔桃花今幾開秦皇
及漢武求仙亦荒哉弱水三萬里何處登蓬萊與君且
一適隨意坐蒼苔

坐看萬古月因思萬古人萬古人不見萬古月常新持
酒勸我飲可以成主賓利劍不斷愁大藥胡能神南阮
與北阮一富復一貧白骨俱化土碧草空自春酒盡月

欲落狂歌驚四隣

烏龍井

附考海寧縣東南七十里西近談家山相傳畢蘇將軍之黑馬跑此得泉遂名

曾飲烏龍泉爲愛烏龍井不辭升降勞迢迢越南嶺石
散駝馬羣樹結龍蛇瘦遂坐泉上亭聊以觀我影歲久
科斗滅朝寒轆轤靜徘徊不忍去勝處心已領有約待
春深攜客來煮茗

十月既望鳳皇山晚歸

附考虎林有鳳凰山雲閣亦有鳳凰山名小鳳

海寧有鳳山在鷹窠山之西亦名鳳皇

邨黑畏衝虎且復歸柴門風林月未出宿鳥爭且喧浮
雲忽斷續萬丈飛金盆湛湛天宇高光氣相吐吞我行
月還還是身亦無根試求不死藥飛騰同久存老妻有
斗酒洗蓋當前軒酌酒消我憂萬事俱忘言

白水邨

附考在鷹窠山
之下今名東湖

朝發白水邨風帆健如馬行人互先後去鳥紛上下白
雲生遠岑青天入平野依稀林木外幡幢見精舍河邊
四五家猶是雞豚社我遊亦已屢把酒心莫寫欲訪桃

花源悠悠愧漁者

九日遊鷹窠山

附考海鹽縣南三十里前臨澉浦後枕大海十月一日觀日月

並出謂之合璧

忽忽已九日出門淨無泥地偏寃斗絕有山如會稽賓客後雜還僕夫各有攜天風海上來我馬騎且嘶坡陀出險徑窮宛遵迴溪前登鄭家嶺始覺華蓋低作者四五人更托千層樓日午扣其戶不愁蒼耳迷欲俯棲鶻巢上凌萬丈梯豈但畏猛虎彷彿聞天雞共燕修竹林

落日猶在西相看且一笑四郊多鼓鼙

兩河兵興京師乏食民部尚書曹公德基出使

三吳因紀其事

東南寔天府歲漕三百萬龍城積紅腐虎士班白粲焉
知十五年不解戎馬亂采稆以爲食屯集成背叛至今
兩河地僵屍作京觀諸侯土貢絕君憂切宵旰尚書出
宣旨跋涉非所憚國無九年蓄志士常切歎空山獨病
臥無書托飛翰中宵望使星迢迢阻河漢

送金子厚歸杭

故人金子厚四十猶落魄扁舟沂江濤訪我黃山脚我
慚老窮經春蠶空自縛羨君神仙姿翩翩九臯鶴不上
光範書暫賣壺公藥高視萬物表道尊卿相薄山中十
日留窮天慰離索聯詩出險語酌酒成大噱東風碎河
冰歸思中夜作鵝黃催柳條椒紅折梅萼重來未有期
惜別中頗惡俱宜慎出處一瓢寧改樂飛鴻正南來有

書辛相托

贈迮元霖

迮生固長貧賦詩朝忍饑破裘連百結但覺詩愈奇
鏘然擊天球未作秋蛩悲鳴呼識者死舉國無人知鼓柁
洞庭湖遠過三高祠我無一斗酒爲生開兩眉宇宙非
不大四顧將安之日落暮山黑百鳥爭寒枝翩翩五色
鳳寂寞雙翅垂聖人坐明光遲汝一來儀

耕樂軒

隱者東海頭安時事耕鑿有田百餘畝相率治燒塉我

稼沒牛腹我書挂牛角三洲雷雨均旣耕必有獲吹簫
賽田祖操豕不爲薄上給縣官租酣歌見真樂江南風
景異況乃賦斂數連雲桑柘盡池臺總零落尚恐兵未
休遠近無土著全生虎豹羣豈忍厭藜藿

泮池荷花

荷生泮池中雲覆明鏡密清飈激回芳濁水鍾妙質凝
碧洗朝雨嫣紅酣落日折莖或牽絲食薏時摘寔猶疑

南浦泛諒非東林匹

戲贈李煥章

善博不成梟善射不成鵠及此感衰謝世道方局促皎
皎明月珠如何混魚目

食糟蟛蜞

江鄉富魚錯有物小而鎧天晴走白沙月暗來滄海空
憐朔客疑尚被南翁採刀斧不足膏瓶罌遂俱逮失身
酒泉流舉族糟丘醢對此哀汝生食之豈其罪

乙巳除夕

春風何處來庭草忽已碧不惜流年馳感此千里客管
葛樹功名孔顏豐道德低回違宿願覽鏡雙鬢白高堂
夜張筵新酒行琥珀得失誰與論浩歌永今夕

題尚北海聽雨軒

海門飛雨集高棟有餘清斜侵虛壁過遠逗大江平簷
花朝亂滴庭葉夜俱鳴涼知蘇道渴潤喜濯園英微茫
空暝色蕭瑟自繁聲飛蓋阻來客獨坐軫深情

檇李郭宗夏兄弟五人友愛尤篤後值兵變東

西散處宗夏思之爲作五雁圖賦詩一首

五雁何翩翩飲啄同清池失路在中道饑寒不相知昔爲八龍聚今作四鳥離驚飈廣漠至十月百草衰天高羽翮短苦受胡鷹欺上林豈不廣念汝歸何時管蔡興流言坐使君臣疑京城死太叔寤生手刃之淮南歌尺布千歲有餘悲東阿苦不容七步詠然萁骨肉成虎狼所爭毫與釐我觀五雁圖爲繼鵠鴒詩

次韻張希載雨中書懷

夏雨盈百川高岸復深谷鱗鱗低度雲汨汨駛流瀑口
營歎翔鶴臆訴哀病鵠征夫在中道少妾亂心曲更希
若木光照此車下獨

凌霄花

大椿何亭亭相傳五百載陵苕亦揚芳灼灼藉光彩感
彼徑寸苗附此千尺喬同心無異俗假翼在崇朝朱榮
耀白日翠蕤牽清飈纏綿欣有托綽約靜無妖坐愁節
序易顏色易俱凋

丙午七夕二首

生寡靡祿情不復就羈絏曝衣記蚤秋置酒陶嘉節曲無二八舞味薦水羞潔輕紈怯迅颺明燭欺初月林鳥戾且飛玄蟬淒更咽主賓聊晤語兒女空感別耿耿候雙星漏終河漢沒

芳燕樂清夜浩歌悲暮年故國山河迥殊方斥堠連友于成契闊賓客暫周旋念曠情易洽懷歸思更綿列星稀未出金波澹始弦落燼秉殘蠟繁吹起終筵後會復

經歲舉爵共無眠

讀書堆

附考華亭亭林鎮寶雲寺後有高丘即梁黃門侍郎顧野王於此修輿地志時

呼爲野王讀書堆
野王字希馮

泊舟亭林湖突兀空王宮當時讀書處鳥雀呼秋風前
瞻兩金山抃舞波濤中眷茲一簣力克配千仞崇恐有
文字藏中夜飛白虹荒哉夢中語且復誑兒童我亦有
書癖玉經老未通草堂可遂結當作兩希馮

登積慶寺閣

附考在顧亭林市東

層構何巍哉金碧中突兀俯見百里外山斷平野濶青
天傾東南伯氣忽已滅憶昨皇慶初六合旣同轍眷茲
葭菼中鬼工成觀闕我來屬喪亂彷彿大業末奔竄雖
云苦登眺亦頗悅居庸不可見太華纔一髮故鄉今何
如路險復霜雪蒼蒼白日晚目送歸鳥沒

名都篇

趙魏天下樞相從多貴遊起家至千石結客傾五侯光
輝喧戚里意氣動神州蹋鞠東城罷張筵西第留倒海

金口玉言 卷二
爲我飲兼山爲我羞妙舞呈楚豔清歌列齊優共稱齊
三壽惟願樂千秋福盈知所戒寵極懼生尤

蘭

叢蘭何青青羅生滿中澤阿那風葉翻歲壯露房折芳
潔終自持光榮諒誰飾勿爲時所化歲晚同荆棘

對月懷邵蕡谷

攜酒東園遊望舒已就缺促席尊未空方舟君夜發東
西耿相望復對三五月階前皓彩盈牕下朱榮歇同袍

成異縣思逐回風結異縣非千里邈若胡與越吳趨唱
誰和楚調哀自輶感此百年客世故恒羈絏榮華一朝
露采秀亦可悅歸濯清江流冥棲保芳潔

懷夏士文

棲船昔西邁霜降百草衰日月一何遒子行忽經時衆
綠榮枯條谷鳥鳴且悲豺虎塞道路鬱鬱勞我思我思
晨復夜諒匪渴與饑行人發吳門消息安可知且復慰
其私豈敢言是非惜哉無六翮念子何當歸雲中有黃

鵠會見東南飛

郊居

直木惡爲輪疲馬思卷旆匡時旣非才處約斯寡悔采
詩鑒興亡讀易明進退永懷嵇阮放甘與沮溺對

送潘時雍歸錢唐

海縣兵未息公子今何之酌君葡萄酒聽我白苧詞憶
昔來黃灣始爲童子師諸生老伏勝說客慚張儀連床
風雨夕秉燭聽新詩殷殷金石聲真足解我頤同居石

壁下斗柄條三移脫畧勢利交所貴兩不疑久懷地主
恩亦有尊鱸思束書向錢唐磬折從此辭錢唐寔都會
西湖天下奇朱樓起相對上有千蛾眉羽衣何翩翩處
子冰雪肌樓前五陵兒竝馬金鞭垂酒酣復張樂但惜
白日馳近者屬凋喪不及全盛時空山鳳皇去月黑號
狐狸春風吹行殿碧草生荒基何當從子游觀濤醉鷗
夷辛苦草太玄徒爲廉藺嗤子寔濟時具飛騰方在茲
直石既已遇小大隨所施從容宰相前奮舌論安危豈

無一尺箋盜賊不足答天空羽毛急水涸舟檝遲臨期
更揮淚中年傷別離

題誠道原瀟湘八景

瀟湘夜雨

江空夜如何急雨千里灑水生黃陵廟雲暗蒼梧野鼓
瑟來湘靈移舟近漁者重華不可見竹上淚如寫

洞庭秋月

軒轅已上天弓劍人間留惟餘萬古月長照洞庭秋君

山雲氣滅水合天光流勿遣金蝦蟆脫歸千丈湫

漁村夕照

羲和忽西匿阡陌散餘輝澄江度雙翼遙岑明半規孤
煙棊店起歸人一何遲遺榮羨父老衰白無所悲

江天暮雪

層雲起北渚萬象入鴻濛散漫飛輕雪低回逐勁風思
羣無牧馬失侶有征鴻泛泛獨垂釣扁舟黃髮翁

平沙落雁

羣雁來衡陽亦如萬里客日暮空徘徊欲去飢無食兼
葭暗汀洲驚飈吹倦翼上林須春歸寧爲羅網得

山市晴嵐

山光洗新黛好雨不崇朝日遲蒙薄霧天近靄微霄茅
茨猶隱約金翠鬱崿峯前峰恐無路有客度危橋

遠浦歸帆

楚客發天際揚帆入三湘回首青山遠忽已過潯陽晚
樹何歷歷歸思浩茫茫永愧波上鷗漁父共相忘

煙寺晚鐘

清鐘象蒲牢夜觸海底鯨海鯨豈有意蒲牢本無聲二物偶相值坐使百里驚高僧定初起月上空山明

丙午冬十一月辟亂亭林明年春館於楊溪邵
箕谷氏四月一日鄉兵復大起合境之人鳥
驚麇竄不知所屬余亦去而從之既定而返

因寫懷云

茫茫新戰場白草迷四顧烽火連石門我歸亦無路窮

魚久在轍驚鵠空繞樹故園今何如猶思讀書處近聞遭殺戮豈復有親故安得附晨風從之西南去

出璜溪

附考屬華亭市
鎮今名呂巷

白首事章句不登金馬門空名苦爲累遂枉三聘煩一瓢雖屢空五鼎非所存願偕田父遊卜宅溪南却霜寒收柿栗日暮牧雞豚去矣從本性得與巢許論

歸崇德西曹郎

田翁驩我歸假我茅屋居石橋跨流水夏木交四隅風

蟬聒旦暮亦有安巢烏覽之爲欣然息駕歌唐虞寄我六合內何地非其廬荒哉百年客千金營一區

遷居

我貧無定居一歲三四遷破廬僅蔽席於生已爲寃南隣盛車馬北里驚綺紈高樓出雲雨一一居神仙何異玉臺秀四時遊且盤念力守窮樓去去非所安

立秋日

葉落天始秋一氣自回薄鬱蒸變淒厲衰老獨先覺行

雲翳白日向夕風雨作所欣同一溉流水百道落園葵
遂含滋可以供我酌白髮西隣叟相遇慰漂泊貽我酒
兩鷓對之中頗怍高歌盡君觴從人誚徐邈

夏夜

憚暑夕屢興飛蟲亦紛拂玉宇曠無鄰星河阻靈匹眷
茲朱火中悼彼青陽失舊知傷已逝新歡邈難即蟲蟲
氣如焚惕惕心爲怵懼先霜雪交易變蒲柳質彷徨不
能寢坐候東方日

丁未重午

世亂無安宅盡室久在路山蜩始一鳴海燕時雙去已
歎朱戶非不見龍舟渡采藥詎能壽酌酒聊自豫四時
倏相代百歲同爲寓日長坐風簷更讀離騷賦

答客

竊祿非本性適彼南山阿藜藿日不充慷慨獨高歌有
客向我言與世同其波商君震七國季子傾三河區區
守章句白首成蹉跎念之爲三歎所樂良已多潛魚駭

釣餌飛鳥愁網羅結駟非不榮達已當如何

題綠綺軒

朱絲操白雪白鶴舞婆娑猶聞廣陵散不廢懊懷歌風來茂苑樹月落洞庭波不見古人久焉知古意多

仲冬秋涇客舍

附考涇在華亭泰山塘之北橫泖支流

水涸天始寒輿氣薄締綰空林無榮木斥鹵草俱白紛紛各有營驅馬不得息嗟余亦何者慘慘長路側飢寒恒累之豈不厭所歷北風來廣漠徒御皆少色踴躍但

四顧白日忍西匿山川莽悠悠沿洄良未極索羣中野獸逐侶南去翼誰能獨無情歸哉山中宅

皂林驛

附考屬桐鄉縣

朝發白水邨夕次皂林驛水腥無飲馬林黑有歸翩昔時兵交地白骨如山積萬竈今已夷風亭煥新飾居人尚星散父老悲故迹團團闊山月夜逐南征客

春日宴滄洲

并引附考邵文博治圃楊溪有綠陰軒流月軒樂禁書處

歲在著雍涒灘春三月一日筠谷高士合賓

客序兄弟飲於滄洲一曲平地湧翠高閣延
青圓景中天繁陰四合微飈遠激幽芳襲人
清飄在壺嘉肴既旅徵蟋蟀之刺儉美伐木
之求友終宴忘疲遷坐復酌鳴葭間發協朱
鳳之相和舞袖雙回翩驚鴻之欲舉嗚呼闌
亭金谷會豈能常滄海流沙兵猶未息懸神
仙之無驗宜曠達以為高用綴新篇以紀雅

集詩曰

天闊無留雲山明洗新黛過從屬休暇置酒滄洲會柔
荑綠堪藉雜英紅尚在累觴既不辭秉燭還相對清彈
促哀響祕舞呈修態蘭亭今已矣金谷徒增慨大化會
有終四時寧復貸厭厭夜無歸從人譏倒載

遊仙詩三首

巍巍閬風臺層構切青霄一氣存太始三神建高標天
風翼芝蓋仙曲和簫韶左攜赤斧遊右御三圖朝上帝
領其頤元君目相招富貴一脫屣於焉恣長謠

寸田何茫茫其廣周九野超然凌崑崙銀河夜西瀉高
厲風塵表日月乃在下神官役鬼工樓觀丹青假勾陳
與玄武衛此神明舍麻姑別千霜豈是得道者不見海
三枯白髮徒盈把

景風扇玄圃漠漠瓊花開手羨天上月夜宴九成臺盤
行五色芝酌以紫霞杯黃屋豈爲貴秦政亦荒哉浩然
中獨存萬象方胚胎紛紛夢玄駒生死亦堪哀

丁一鶴

大道日已蕪游談紛瑣韓非不得死商鞅終梯禍偉哉高世士結屋青山左年來頗得道已覺初心果朝漱玉池津夜存金鼎火御氣超六虛萬物真螺羸

采芝生詩三首

功名不可恃利祿恒爲愆舉世紛蟻集伊人倏鴻騫十年不出戶上友綺與園金芝敷九葩煌煌生石間朝陽晞宿露光輝一何鮮采之備服食度世希神仙永謝城市人振衣百尺巔黃虞悵已遠肆志獨超然

采采復采采相與登高丘可以充我虛五鼎何足侔茂
陵豈識道且從方士遊徒聞甘泉產更入蓬萊求白日
忽已暮悲風來素秋未若幽居子不懷四海憂清節尚
巢父素心追許由

負版行欲僵飛蠅死猶集赴燭夜蛾焚好酒猩猩泣所
以思遠託道路方險澁寧希百金賞豈慕千戶邑永言
從我求鷓鴣惟一粒有材寔爲累無欲安所入韓彭苦
不悟羞同匹夫執商山今寂寥高風邈難及

題夏頤貞西疇草堂

九山惟鳳皇窩元尊中卣山斷忽平野四水東南流海
潮日夜至新沙成故洲愛此斗絕境遂與長沮遊疾藜
苦滿道相率開西疇俗類桃花源無厯知春秋風寒禾
黍熟雨多桑柘稠土芝頗益氣玉延亦可羞過從有耆
老請謁無王侯四時共相保千歲非所憂如何萬里客
日暮行未休騎虎不得下短衣歸飯牛

清江詩集卷二

欽定四庫全書

清江詩集卷三

明 貝瓊 撰

五言古詩

讀史五首

吾憐閔仲叔始辟懷喜懼及其見司徒喜懼亦皆去勞
苦非所堪虛名豈相誤用舍何必言投劾時已暮
周燮久不仕身屈名四馳玄纁一旦至舉族更勸之安
知修道者出處亦有時慨然中途返獨守東岡陂

東漢多逸民山棲久懷壁法真亦逃名詎屑三公職求
蟬在明火求士當務德此道今何如其人安可識
樊英抗高節萬乘不能屈設壇爲見之豈若壺山逸光
祿位已崇匡時竟無術遂興張楷譏尚待黃瓊出

五侯濁四海白日淪光輝處士切憂國空言相是非郭
泰不絕俗申屠能見機朱鳳翔千仞百世令人希

己酉歲初度日書懷

余生若小草望成百尺材強因客土植苦被秋風摧徒

慚五十過況經元二災白髮不可變青陽忽已回未忘
藥裹好幾見桃花開殘編掩黃石虛室生蒼苔故人且
共棄王孫誰復哀終歸葛洪井詎上鳳皇臺衰榮置勿
論待月酌金罍

初夏郊居二首

強學不知老索居恒鮮歡誓將從余好山河阻且綿淒
淒風雨交四月秋浦寒夕寢不能旦日高猶未餐念之
安所尤通塞固有偏庶無外患及力稼或逢年

仲夏桑扈鳴氣清天愈高新田已當治南風翼良苗田
翁起相戒庶務東作勞豐年諒可必勿爲蔓草交嗟余
失路久竟負伊人招屢空亦宜然何日耕東臯

久客始歸寓井西舊宅述懷

在路日思歸已倦風水艱前經石門店喜見西南山憶
我初去鄉忽忽三十年兒童盡成老比隣無復存阡陌
迷東西甲第空毀垣秋風落古木方池榮夏蓮倏忽驚
世換豈獨遇神仙蕭蕭井西宅白晝惟高眠所欣無維

繫貧賤何足歎

晨興在殳山作

附考在桐鄉千金鄉昔仙人殳基登山修煉後戶解放名

夜雨四簷絕坐待扶桑。暾天高無餘滓。初景方晏溫黃鸝。萃霜木白雁來寒門。所欣居處幽已忘。趨走煩時枉道人。過或逢田父。言傷哉。亂離後衣冠今幾存。賦斂日已亟。何地爲桃源。結茅向絕境。牧豕學公孫。

錢彥彬抄詩爲賦一首

好古思古人。古詩朝暮讀。澹泊玄酒味。和平綠琴曲。古

人今白骨古意不諧俗已歎知者稀古淚空滿掬錢起
亦敦古其人美如玉昨者忽相遇大雪山中宿不知破
硯冰抄詩夜燃燭諒非鮑謝才可繼曹劉躅聽之詎能
歡舊業且當束

對酒懷邵文博擬東野

今日忽不樂綠酒徒盈樽酌酒云解愁愁生如有根安
得二三子促席相與言尚思滄洲地十月花更繁雲隨
鶴蓋合雲避貂裘溫終筵復秉燭歌吹高堂喧盈盈二

八女白苧鶴鵠翻月落猶未歸清夜宿西園到今題詩
處素壁龍蛇昏荆揚忽雲擾海內俱星奔斷腸臨濠謫
回首潁上屯昔如鷹脫韁竟作駒在轆淒涼城南路甲
第今空存蕭湘窗下流三神鎖朱門江險隔秋夢山寒
啼夜魂詎忘白璧贈更戀綿袍恩索居悵無匹落葉滿
孤邱

早春

山寒花尚遲雪霽江已綠懷新感遊子哢節喧衆族且

同尊俎樂幸免章綬束更擬登前峰青郊可遊目

擬出塞曲二首

翩翩荆揚士結束赴幽州將軍豈樂戰可汗為我讐已
通大月氏更取烏珠留驅馬白狼北洗兵青海頭歸來
飲高廟庶雪平城羞

早從漢捕虜萬里惟一身軍中已三年苦樂安可陳但
見隴底雪不識隴頭春北風利刀劍肌膚皆盡皴天王
正開邊詎恤中國民

赴召留別諸友

用世非拙迂白首在山林詩書況久輟禮樂非所任王
事忽相縻遂令違我心迢迢適西道惄惄辭東岑中田
澤雉雊古木鷁鷀吟所親亦吳越耿耿辰與參愁來一
回首涕下徒霑襟終當返田里灌園希漢陰

送吳濬仲

弱冠知君名五十始逢君南宮托同宿十日披清文及
我備修纂快近幽蘭芬茲言歸故鄉告別那忍聞甡甡

中林鹿猶能念其羣況我同心友去住從此分夜渡浙
江水朝看天姥雲春禽正嚦嚦夏木方欣欣安得遂同
載歸耦沮溺耘

六月十五日夜坐明德堂

大火直初昏回飈薦微輿行遵曲池靜坐蔭華構敞天
高積陰散水明圓魄上翩翩去鳥迅唧唧砌蟲響胡為
京國滯屢乖林壑賞吳中有尊鱸吾當理歸鞅

出都門寄張孟兼主事

日落宿都門雞鳴發淳化城南夜來雨連山色如赭青
松夾高岡煙火通旅舍到家須十日畬田熟秋稼如何
山巨源未知嵇叔夜野鶴終去人疲牛豈勝駕寄書謝
所親吾今老林下

辛亥初度日偶成

吾生本如寄有酒還自酣豈待三宜休已知七不堪陶
泓且當傳孔方安可談觸網笑神龜束身悲老蠶倘能
從茲去卜宅南山南

題盛蒼崖雁

八月鴻雁來徃彼天南陬前飛倦已息後至飢相求日落洞庭晚風高彭蠡秋彭蠡多蒹葭遠近瀾汀洲恒恐羽毛損稻梁非所謀寒門阻冰雪異鄉安可留徘徊念其族天外復千儔身今萬里客肉非九鼎羞慎為弋者獲遠寄征人愁願以海為池上同朱鳳遊飲啄全微軀不愧波上鷗

獨酌

行年已六九，髮脫身漸羸。
不及桃李花，遠成蒲柳衰。
貴賤必同盡，造化寧吾私。
徒聞王子喬，何處求安期。
區區營丹砂，貪生無乃欺。
今朝欣無事，酒熟當自持。

初冬

一氣變昏旦，洞房風露淒。
田禽亦已化，秋蘭同疾藜。
為客久成老，懷人殊未夷。
慘慘白日暮，迢迢歸路迷。
世衰不獲騁，天遠何由稽。
永思讀書臺，言采山中荑。

孤松

青松類貧士落落惟霜皮已羞三春豔幸存千歲姿
蟠穴其根鳥鵲巢其枝時蒙過客賞但感愚夫嗤回飈
振空至百卉落無遺蒼然上參天乃見青松奇苟非厄
冰雪貞脆安可知

壬子秋七月一日與郭文伯飲於朱弘道竹所
是日大雨擬蘇州

殘暑尚為厲客坐三四遷青山一雨過虛室夜翛然欣
與公子酌語契中頗宣雖無絲與竹庶罄賓主歡所貴

相知深豈惟懷一餐尊浮玉粒膩炬折金葩圓厭厭詠
露斯會面良已艱天明即鴻燕西望獨悄悄

擬東野

破屋夜通月霜氣刀稜稜病骨不受寒卒歲仍無縷殘
燈吐復翳僵卧如凍蟻事業慚蒸沙文章空鏤冰已失
國士意頗為少年陵長歌獨慷慨坐候東方升

送錢公擇還象山

金陵一杯酒送子歸海隅五月南風正荷花滿鏡湖登

堂酌春酒上奉雙親娛但惜千里別莫贈鮫人珠雖同
天地間一旦吳越殊皎皎渥洼子翩翩丹穴雛悵然不
得從遠望白雲孤

題聽雪齋擬孟郊

霆轟急雨瀉石闢衝波盪百族巧鳴春絡緯催秋紡詎
知空山夜聽雪乃真賞病骨僵如蠅殘燈掩虛幌積玉
呈幻質潛韶泄微響一氣變鴻濛五音歸恍恍神清已
無夢理悟寧有象苦寒不可禁更被王恭鑒

夢遊澄林

我夢遊澄林方舟坐垂釣一水窮縈迴三峰隱奔峭娟娟碧篠合灼灼朱葩耀殘雨趨回風斷雲通返照林昏暝老炊溪動寒女漂平生愛桃源何年陟員嶠永慚白髮滿起應金門詔猶思洗藥處空歌採菱調一鶴已興譏九龍那免誚覺來復京華語兒成一笑

楊貞婦王氏詩并引

天台金沙里女王靜安年十七歸同邑楊伯

瑞伯瑞為樞密院斷事官未幾死於兵靜安
守節不嫁權貴爭求之至斷髮自剄不殊余
讀其傳而悲之為賦四章以明其始終云

石上有琅玕孤生何猗猗婉彼深閨秀笑語閒且儀榮
華諒未晚芳潔當自持玉鏡一朝委相求豈無媒

冰泮時當歸遙峰翠新拂行行別父母遂居君子室君
予官已崇新歡鼓琴瑟如何事前驅中道永相失

東家有宋玉西家有王昌皆知慕明豔詎忍墮大綱露

多鳥能汚江水不可方貞心耀白日峻節厲秋霜
泣淚欲成河捐軀遂如墓寧同陌上花誓比山頭樹織
綺獻秋功條桑事春務向非厄強暴豈知金石固

送王公勉赴沁水教諭

清霜墮一葉白下未知秋倦鳥息高陰潛魚倚弱流君
子方北首山河阻且修歲久衣盡縉驅車良未休我無
雙明璫何以結綢繆悵焉隔千里白雲空悠悠

題金德俊葵軒

結廬在林屋所欣知者稀南風應蕤賓我圃日芳菲負
杖觀其生草多露滿衣有葵獨傾陽豈願回清輝清輝
雖不照物性諒無違

禮部員外張惟中七月十二日暮歸賦詩八韻
和者自尚書牛公以下凡若干人夫漢謠魏
體互有不同巧於狀物者過麗切於言志者
恒直惟中退食之頃率爾成章且不以私而
忘公情與景俱至已余因續衆作之後瓦器

不足以諧空桑也

秋至星光流病覺中歲劇成均忝分教才非一狐腋日
入欣暫休野老或爭席清談雜虛無以永風月夕百年
會有盡富貴非所適鳴蟲亦知候倦鳥思假息脫冠已
童然如何拘百役酒醉不復言道固存目擊

秋懷二首

露下百草變淒淒天地秋亦如中年客玉顏安可留山
鳴迅商激水涸行潦收恩方改圃扇意復存敝裘梧桐

葉盡脫孤離夜啾啾光景忽已逝感之雙涕流

黃鶴日千里潛魚必深池蠹茲橘中蠹化蝶俄天飛翩
翩若不已倏忽膠蟲絲兩翅旣摧折何日回枯枝非才
慎所處富貴亦何爲且盡一杯酒物我共忘機

題畫竹并序

太史公紀渭川千畝竹此圖僅盈尺而遠意
不翅千畝觀其毫枝髮葉歷歷可見於秋煙
暮雨外筆法視古亦精已寓目久之遂起余

兩山之興徑欲買舟歸卧其所云

市朝非素心林壑契玄賞讀書甘寂寞密竹更蕭爽衝人虎豹徑閉戶蠻蛸網寒梢朽不蠹野筍苞初長風生回鶴夢月出聞猿響如何猶戀祿廄馬存病願相期結二仲茲焉共來往

送黃仲麓上官檇李

嚴霜戒秋杪百草俱已衰子別何匆匆一樽聊共持今晨白門道後夜滄海湄長歌獨慷慨健步何逶迤古來

聲利場日出紛火馳進非才不任退亦分所宜吹竽我
豈濫售璞人皆嗤峻節當自厲坦途方在茲從容有新
語千里慰相思

次韻張思廣助教登雨花臺

行行出城南，登高望三丘。
雉堞壯天居，宮殿若雲浮。
星分斗牛野，水合江漢流。
蒼然淮上山，聚米當馬頭。
氣已無朔漠，人今冠古州。
慷慨憶當時，遠近開朱樓。
仙人翠羽帳，王母珊瑚鈎。
貂蟬謁七貴，車馬從五侯。
光輝互照。

耀意氣何綢繆皇威復禹跡風氣移荒陬千屯夾虎士
萬斛回龍舟將軍衛霍功相國房杜謀我來覽竒觀發
興屬清秋已將函谷竝遂與洛陽侔所悲迫衰謝濛汜
安可留目送桃葉遠水深鳬雁洲清談哂諸老匡時忘
遠猷庶窮八極曠慰此千里游

題朱孟辯層巒圖

疊嶂何崔嵬遠近皆可數不學王宰遲棄墨如棄土林
藏風雨黑石戴冰雪古初疑造化鍾已覺精靈聚遙思

兩山下流泉細通圃茅屋今何如人去苔生戶

送盛孔昭赴淄川丞二首

天寒北風厲有客赴臨淄臨淄古大國山川何逶迤小
白相夷吾尊周攘四夷田單守即墨一日走燕師二子
不復見名今千載垂為我弔精魂伯功未可卑

魏有徑寸珠守境無檀子照車十二乘何如照千里世
乏威王賢孰知天下士所以飯牛兒商歌中夜起徒求
南海產半觸蛟龍死異才何代無糾紛今可理

題上虞柳機仲朝暉軒

日車上扶桑。瞳瞳雞子黃。遙夜忽復旦。仰瞻有啓明。征
夫起當發。宿鳥號且翔。城郭互參差。曲戶通天光。空照
堂中人。豈銷髮上霜。竹枝自垂蔭。萱草亦揚芳。此心諒
已短。此恩一何長。欲報固無極。念之安可忘。

雨中漫興

端居少賓客。鳥跡徧階除。夏雨復薰旬。衆木青扶疎。金
石何必陳。此樂當何如。永懷漆園吏。相去千載餘。萬物

雖一體忽若吳越殊人苟不知我我豈能知魚

臨川饒孟持所居西軒有先大父所植杏一株

今百年矣幸不翦於兵火因築亭於旁名杏

庭云宋景濂作賦予賦詩一首

結構非壯麗可以樂晨昏仰蔭百年樹深蟠千歲根
粲朱葩敷離離青子繁秀出風煙表潤含雨露痕戎馬
方縱橫境內悉崩奔桃李摧為薪荆棘翳高門榮華諒
難恃尚見文獻存未擬匡山田詎論曲江園讀書絃素

秉命客置芳樽永言益封植祖德慎無諉

擬古

荆山一何高上與天門通猶聞產玉處吐氣成白虹縣
藜混燕石世已無國工琢之懼不完不如在石中卞和
耻再刖玉亦悲無窮吾今死抱璞庶以全其躬

晚眺

極目登高丘秋高淮泗平淮泗東南流故繞鍾離城東
京昔喪亂英雄紛戰爭殺人及雞犬曠野寂無聲悠悠

千載下復見新人耕魏公今何在銅臺春草生公路冢
中骨豈憂王室傾北海固為豪平原安可輕時哉有屈
信漢道再昌明

古意三首

春風天上来滿城紅與紫如何朝暮間飄落隨流水堂
前兩冬青霜雪猶不死向來三月時誰言及桃李
對酒發長歌歌長苦難續浮雲空自行白日安可逐黃
河走東海千里纔一曲奈何人之心頃刻有翻覆

六國多好士堂上各三千所親苟不慎禍福恒相因李園賊黃歇馮驩復田文種桃得秋寃蒺藜徒刺人

六月二日至臨淮夜宿方文敏東軒

北斗分四時恒星自昏曉如何百年客貴賤俱擾擾酒酣虛室卧雨絕四山悄道冥天地廣身在風露表六合一何大毫芒未為小宅神何寂寞適意忘纏繞朱絲竟誰賞白髮今已少永期江湖居相親有魚鳥

送張思廣歸平陽

十月天地閉北風河已澌送子千里道太行極崔嵬日暮歸鳥疾雪深蒼兕飢酌以一卮酒為涴身上衣伐木還重賦白駒不可維悠悠南北歧惻惻勞我思

分題送友得忠孝廟

附考在江寧雞鳴山陽晉尚書令卞壹咸和間蘇峻

作亂壹力戰死之二
子盼亦赴敵死

丈夫死殉國於道詎非宜烈烈下侍中忍顧王室危梟獍敢為逆我師焉可支躍馬嬰其鋒以肉充虎飢苦戰既不旋有子亦從之精忠貫日月未慚馬革屍至今石

頭下尚使行人悲鬱鬱治城山秋風吹古祠送客遠相
過慷慨傷我懷當時諸老臣清談竟何爲酌酒酬英魂
忠孝以爲規

池河驛

附考屬鳳陽定遠縣

早發紅心驛日暮宿池河百里無人煙孤兔馬前過山
明見野火溪淺通微波却立時躑躅前登益嗟峩北風
何蕭蕭塵埃衣上多下馬留信宿對酒一長歌

大槍嶺

巍巍大槍嶺羊腸盤九曲深林野雉雊短草豺虎伏行
人疲不進慘慘對僮僕下得仙居澗始復就平陸一株
羅浮花春深粲如玉五年悵不見今日開我目

滁陽驛

羣山繞滁州城郭帶林壑豈惟居人稠遂使遊子樂苜
蓿青滿野羊馬盛幽朔固知英雄主四方歸大略回視
清流關往事殊可薄新花寒未開細雪輕猶落且持一
斗酒獨與故人酌

李氏三節婦行 幷序

隴西李子平氏子茂德聘同郡張氏女年十八歸李氏生子庸甫六歲而寡舅姑憐其少也欲嫁之使左右風之即引刀欲斷髮以見志乃止茂德之弟仲德亦早卒其妻張氏年二十有八生子慶方亂亦誓不再適從弟希賢妻陳氏二十有四希賢卒時其子度方孕四月一門三婦以貞白聞而庸既長好學仕

元至正間累官至同知濟南路總管府事推恩贈父將軍同知益都路總管府事隴西郡伯母封隴西郡夫人再調闕襄宣慰階中奉大夫而夫人始卒年五十有六大明革命洪武初辟庸為司農主簿四輔至嘉興府知府所至嚴而不殘夫人之教為多至今滄州父老猶能道之可見家法有素而關於世教之大如此為賦三婦行以備太史氏所采云

赫赫隴西傑奕葉何光輝一門見三子不同鄉里兒三
婦名家妹玉貌長娥眉大婦居中堂夜織流黃機中婦
具朝食泉出江魚肥小婦二十餘金刀新製衣青松與
女蘿百歲欣相依未及白頭日雙鳳俄分飛入房洗粉
黛豈復施珠璣盤龍掩明鏡寡鶴琴中悲生既不同室
死則須同歸鴻雁猶有信婦道安可違殘燈冬夜長素
月光徘徊共績還共語白玉當不灰有子官已高少壯
忽復衰丈夫少氣節恒懼白刃威女子乃如此鹽山同

魏
魏

四月十日兒子翹翩來鳳陽留一月遣歸因令早營草堂又山下為止息之所云

老病不得歸獨處常戚戚二子江南來眼暗初未識坐常戒垂堂肌肉如雪白一月長途閒海風吹盡黑買酒為相勞問答向中夕迢迢漢陽薄春來斷消息阿宣在母傍頗知工翰墨艱難且撥棄倏使沈憂釋所愧無定居百歲半為客經營須及早尚愛龍湫僻况近讀書臺

雲銷四山碧，泉深出丹砂。
地冷多琥珀，既非匡世資。
庶遂陶阮逸，良辰戒僮僕。
匆匆又南北，五月方鬱蒸。
日氣成霞赤，出入非所宜。
川陸慎所歷，惜別豈無淚。
向汝難再滴，秋江有鱸魚。
當挂吳淞席。

述懷

浩蕩三十年如萍，寄滄海，起為太學師。
一日揚光彩，迢遞赴中都。
送客紛雲靄，名慚相國知禮感。
親王待徘徊，未得去。
忽復朱顏改，詔許江南歸。
青山草堂在，放浪黃

牛郎猶瞻金馬門適性詎非樂捫心空自論田翁四五
人共忘鄉相尊把酒酬爻基白石今猶存天寒落松影
歲久生苔痕試求金光草超然事幽討依稀顧況臺寂
寢錢王道東門歎黃犬稅駕胡不早長歌歸去來吾從
鹿門老

送閻炳文歸安陽


并序

國子生河南閻炳文為童子時父母先後歿
殯於道次越十有九年阻兵未及祔安陽之

祖塋乃謁大臣求歸而改葬焉大臣許之戒
塗有日助教貝瓊為之序復繫以詩曰

河內昔喪亂遠近俱騷然操兵起殺吏夜探赤白丸健
者方出走父子焉能全遂令半為鬼暴骨滿道間閭生
當此時幸脫豺虎患二親不及葬有淚空流泉荒阡翳
荆棘魂魄驚未安飄飄來南都太學留經年安陽右大
行所悲家室殘堂封已當營何日歸青山松栢久化石
蕭蕭風雨寒永慚反哺鳥無目視蒼天巍巍天祿閣蕩

蕩金馬門敢私一身樂莫報三年恩上謁二大夫吐詞
亦何酸往求狐兔區重卜棲鳳原五月南風生獨上龍
江船白雲暮悠悠送汝千里還



清江詩集卷三